

INUIT ATAQATIGIIT

Inatsisartuni



24. juli 2024

UKA2024/53

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Namminersorlutik Oqartussat, Kommunillu sanaartugassanut aningaasartuutissaanninngaaniit ukiumut 1 %-mik, pisortat sanaartugassaataannut immikkut toqqakanut kusassaanermut aningaasaliissuteqartalernissaq, kusassaanermilu eqqumiitsuliortunik suleqateqartalernissaq pillugu Naalakkersuisut inatsimmik suliaqaqqullugit peqquneqarnissaannik Inatsisartut aalajangiiffigisassaattut siunnersuut. Sanaartugassani kusassaanermi sanaartukkap silataata, iluatungaatalu kusassarneqartarnissaat matumani pineqarpoq.

(Inatsisartunut ilaasorta, Peter Olsen, Inuit Ataqatigiit)

Tunnngavilersuut:

Nunatta avataanut paasisassarsiorluni angalatilluni paasisaqaarlunilu isumassarsiornartaqaaq, iluaqutaasaqaarlu.

Assersuutissaqissuuvoq Savalimmiut, inuttussutsimigut uagutsinnut naleqqersuunneqarsinnaalluartaq.

Takusat paasisallu ilaat tassaavoq, pisortat aningaasalersugaannik sanaartortoqassatillugu eqqumiitsuliortortarminnik qanoq atuilluartigisarnerat. Nuannaartunarput usornarpullu eqqumiitsuliortortarminnit pingaartitsinerat tapersersuinerallu.

Assersuutigiinnarlugu atuarfiliortoqartillugu, ilinniartoqarfiliortoqartilluguluunniit pinnersaanerup kusassaanerullu tungaatigut eqqumiitsuliortortaminnik qanoq atuilluartigisimanagerat takuneqarsinnaavoq.

Pinnersaataasut kusassataasullu tasaanerularlutik; kulturiminnut, oqaluttuaatiminnut, oqaluttuarisaanerminnullu tunnngassuteqartut. Taamaalilluni sanaartugaq kusanarneruliinnaranii aamma pikkunarnerulerlunilu anersaaqarnerulersarpoq. Siunertaqaarluni oqariartuutitaqartarlunilu.

Taamaliornikkut inuiaqatigiit anersaakkut pisuunerulersinneqartarput; Inuiaqatigiit anersaakkut pisuuneruliinnaratik aammali eqqumiitsuliortortaqaqarnermikkut pisuunerulersarput; eqqumiitsuliortoq pisortanit atorluarneqarnermigut eqqumiitsuliortuunini aamma inuussutissarsiuutigilluarnerilersarpaa. Taamaalilluni tamanut win win-iulluni, tassa tamanut iluanaarutaalluni.

INUIT ATAQATIGIIT

Inatsisartuni



Nunatsinni pisortat akiligaannik sanaartukkat, alutornarnerulerlutillu kusassagaanerulissappata aammalu isumaqarnerullutillu anersaaqarnerulissappata, soorluuna aamma uagut nunatsinni eqqumiitsiliortortatsinnik sanaartornerup iluani atorluanaanerulertariaqartugut.

Nunatsinni anersaakkut pisuunerulersinneqassagutta, eqqumiitsuliortortagut atorluanerulertariaqarpagut, sanaartornerup iluani peqataatinnerulerlugit, akissussaaqataatillugit kivitseqataatillugillu.

Taamattumik tamanna tunngavigalugu. Namminersorlutik Oqartussat, Kommunillu sanaartugassanut aningaasartuutissaanninngaaniit ukiumut 1 %-mik, pisortat sanaartugassaataannut immikkut toqqakanut kusassaanermut aningaasaliissuteqartalernissaq, kusassaanermilu eqqumiitsuliortunik suleqateqartalernissaq pillugu inatsimmik suliaqaqqullugit Naalakkersuisut peqquneqarnissaannik inatsisartut aaliangiiffigisassaattut siunnersuuteqarpunga.

Siunnersuutigineqassaarlu immikkut toqqakkatut sanaartugassanut tunngassuteqartut tassaassasut; Naamminersorlutik Oqartussat iluanni Kulturikkut-, ilinniartitaanikkut,- isumaginninnikkut,- peqqinnissaqarnikkut,- aammalu inissialiornikkut sanaartugassanut tunngasuteqartut aammalu Kommuneqarfiit iluanni atuarfeqarnerup iluani sanaartugassanut tunngassuteqartut.

Nuannersumik angusaqarfiulluurtumillu oqallittoqarnissaannik kissaassillunga.
Qujanaq

Pisortanut aningaasatigut allaffissornikkullu kingunerisassai:

Najoqqutassamik suliaqarneq allaffissornikkut ingerlatsinermi AC-mik ilinniarsimasup nalinganik, tassalu 250.000 kr.-nirik naleqarumaartoq naatsersuutigineqarpoq.

Taassuma saniatigut naatsorsuutigineqarpoq Namminersorlutik Oqartussanit, Kommuneqarfinniillu katillugu 4.5 mio.kr-it missaannik ukiumut sanaartugassanut kusassaanermut aningaasaliissuteqartarnissaq. Aningaasaliissutigineqartussap annertussusaa uannga tunngaveqarpoq:

2024-mi Namminersorlutik Oqartussat Kulturikkut, ilinniartitaanikkut, isumaginninnikkut, peqqinnissaqarnikkut aammalu inissialiornermut sanaartugassanut 359 mio.kr.-nik aningaasaliissuteqarput. Takuuk aningaasanut inatsit 2024-meersoq. Taakkunannga 1%, 3.5 kr.-nik annertussuseqarpoq.

Soorlutaaq Kommunit 2024-mut missingersuutaanni sanaartugassani atuarfeqarnermut tunngasuni katillugu 91 mio.kr.missaannik aningaasaliisoqarsimasoq takuneqarsinnaavoq. Taakkunannga 1% 1.mio.kr.-nik annertussuseqarpoq.

Namminersortunut aningaasaatigut allaffissornikkullu kingunerisassai:

Soqanngilaq.

Innuttaasunut aningaasatigut allaffissornikkullu kingunerisassai:

INUIT ATAQATIGIIT

Inatsisartuni

Soqanngilaq.

